

又見至如外方地震之變亦不絕不知何故而然也恐懼罔極
戊寅摘奸刑獄○上召對侍講官鄭惟吉曰伏聞玉音不如
常時雖凡人如有氣候不平猶可調保况玉體尤當調攝慎
重古人曰養心莫善於寡欲主上如今血氣方盛常念節其
人欲保養心性使氣候每為清明則聖體自安寧矣

己卯夜月暈○忠清道鴻山扶餘石城地震屋宇搖動庇仁等
六官亦地震

辛巳傳曰冬即過半不寒不雪連日沈霧祈雪事問於禮官○
夜乾方艮方如火氣○慶尚道靈山昌寧地震聲如雷霆

壬午遣御史閔箕于慶尚道俞絳于咸鏡道尹玉于全羅道察
守令不法○上召對○夜月暈

癸未夜月微暈

甲申遣御史宋贊于平安道察守令不法○憲府啓曰曩者因
加德天城兩鎮新設鳳山龍仁及星黃廣楊四州殘弊以各司
奴婢移定為奴婢以下三道各官奴婢代充其數同是吾民以